

KPÉDÉLÉ TÈSÀLÓNÌKÀ
Kpédélé bà cu wáràgà mì
Páwòlò ji ndâ mbe kù kili ta rẹ̀
mì Bìndi-Mbírì gbí gbata
Tèsàlónìkà

¹ Muu ze tí ndâ mbe kù cu wáràgà tí nó a ndâ 'duù ta'ô: ñinó a ye tí Páwòlò, gii je Sìlìvànò, gii je Tìmatéyò, ká kù cu wáràgà tí nó ji ndâ mbe kù kili ta rẹ̀ mì Bìndi-Mbírì gbí gbata Tèsàlónìkà, tí ndâ 'duù mì ndâ Mbírì Buù, ta Mbe tí ndoo Jézù tí Bìndi-Mbírì. Ze kù cu wáràgà tí nó ta bà 'deke tí ze ji Mbírì máa, yí 'ví cù 'dê ngo cù wó mítí yo. Yí delè 'ví si yo 'ví dù ta 'dê njembí yo.

Nà cè bà 'vala ndâ 'duù gbí gbata Tèsàlónìkà, ta na cè bà tee njembí ndú mítí Mbírì

² Ze ta o 'dáá gí kù 'dè nìkì maa ji Mbírì tacó tí yo 'dáá gí. Rẹ̀ yo delè jé waa 'do gbí nje ze ta o tí nó náa ze má kù 'deke tí ze ji Mbírì nó lá.

³ Bà mbí ze delè jé ta 'bí rì gbaànjé ò tí ndâ nèté tí nó náa yo kù bàkà 'do gbí có mì bà tee njembí yo á mítí wó tí Mbírì nó lá; bà mbí ze jé ò 'do tí ndâ nèté tí nó 'dáá gí náa yo kù bàkà ta tó njembí yo gítí Mbírì nó lá; à delè jé ò 'do tí bà koṛo có mì yo lẹ̀ kácáá mítí Mbe tí ndoo Jézù tí Bìndi-Mbírì lá.

⁴ Ze nò ni gí, máa, Mbírì zè yo nìkì ngé ndii gí, ndâ ná'vindí ze. Ze delè gù nò ni gí, máa, a yí ká

cu 'bì wó mítí yo, máa, yo dù tí ndâ 'dóó ñìnó mì yì.

⁵ Ze ñò ni éno gî, tacó Banga-Ngú-Có tí nó náa ze táánò ma ji yo nó me káa bodo có sínò lá. Ze ma ji yo a có ta wotí ká tí, tí wotí mì Bèri-mì-Mbíri, tí có náa ze ñò ni tí yúco gî. Yo delè ñò ni éno 'do tí ña 'válá tí nó náa ze táánò kù 'vala tacó tí yo si ze kuu mì yo kà nó gî.

⁶ Yo táánò gî tí ndâ mbe ru ndi ze. Yo delè gii gî tí ndâ mbe ru ndi Mbe tí ndoo 'do gbí bà kònò sé'i mì yo. Ndâ mbe kù mèèkè'i tí yo táánò 'dee yo kìgìrigì gî, káa à gii wu bà ùnje gítí Banga-Ngú-Có ta líkí'o ji yo a Bèri-mi-Mbíri.

⁷ Tacó éno, ndâ mbe kù kili ta rè mì Bindi-Mbíri gbí ndâ to Mèsidóniyà ta ndâ to Àkáyà gii ñò bà kònò sé'i ta líkí'o muu Banga-Ngú-Có ni a i 'do mì yo.

⁸ Tacó ndú 'di me káa tàwo bà ma có mì Bindi-Mbíri mì yo cuki lá. Có bà tee njembí yo mítí Mbíri delè wu cee muu to tí ña ñìnó náa gbí nderè bà 'dè có mì ze ji ndâ 'duù gítí káká'i wálá.

⁹ À ndí kpónó a ndâ 'duù ká kù dità ña nèté tí nó náa ze táánò 'bità bà bàkà gbí òkò tí yo nó ji ze. À delè káa ndâ 'duù ká kù dità ña bà 'visi muu yo 'do tí ndâ bààcì gítí Mbíri, ta tàwo bà bàkà nèté mì cèe Mbíri tí nó tí wu Mbíri nó mì yo ji ze.

¹⁰ À 'dáa káa ndâ 'duù ká kù 'vanda ndi có bindi yo gítí bà gî 'Viì-mì-Mbíri 'do gbíri ji ze, 'Viì-mì-Mbíri tí nó tí Jézù, náa Mbíri 'vala ndi wó 'do gbí muu'dú wó nô, Jézù tí nó tí mbe 'vala ndoo á 'do kùro kpo-tàkòcò tí nó náa Mbíri kèji

tí gítí ndâ 'duù nô.

2

Nèté mì Páwòlò gbí gbata Tèsàlónìkà

¹ Yo ta kpéetí yo ò ni gî, máa, ze táánò co gí mì yo kà me kùnga wíri lá. Ze ya gí mì yo ta nderè, bìndi nderè mì ze nò giù yù gî, ndâ ná'vindí ze.

² Yo ò ni gî máa, ze táánò ta 'bí o á kùro bà ya ze gí mì yo kà 'de kpo-se-muu, ze delè giù 'de bà ònoko ze mì ndâ 'duù gbí gbata Filípi gî. Káa áá táánò a Mbíri mì ze ká je wotí ji ze, náa ze giù ma tí ta Banga-Ngú-Có mì wó ji yo á mí kùro ndâ kpo-kpò mbe kù jòò gbí có ta yí nò.

³ Rèngbó có tí nó náa ze kpónó kù ma ji yo nó me 'vére lá; à me vò kóró-koro có lá; à delè me có ta tíri ká gbí lá.

⁴ À me éno lá. À káa Mbíri 'do gbí 'dóó có mì wó gbí njembí wó ká ò ze ni tí ndâ 'duù ònó náa yì má kpili Banga-Ngú-Có ji ze, ze bà ni bà 'dòkò ndi á go yí á ji ndâ 'duù gî. À má éno, ze kù 'dè có me tacó bà peteke tàkòcò ndâ 'duù lá. Ze kù 'dè có a i tacó bà peteke tàkòcò wó tí Mbíri, tí mbe kù ò ndâ òa có gbí njembí ze.

⁵ Yo ò ngbárángà'i ni gî, Mbíri delè ò ni gî máa, ze jé 'dè 'vére ji yo tacó bà peteke tàkòcò yo nò lá. Ze delè jé bàkà tíri tacó bà 'de i 'do tí yo lá.

⁶ Ze jé pà kpokèjì tacó wàa, ndâ 'duù 'ví ùlù tí ta ze nò lá. Ze pà ndâ i tí nò 'do mì yo lá. Ze delè pà ndú 'do mì ndâ 'bí 'duù lá.

⁷ Nìno táánò bà dù a ndâ i ònó náa ze bà kùmùkù yo, máa, yo bàkà ji ze, sé náa ze a ndâ

tú mì Bìndi-Mbírì nò, káa ze táánò ya gítí ndâ ña ñìnò lá. Ze táánò dù gbí òkò tí yo ta pétékè 'bì ze, go 'bì niì mbe kù kpolo tí dó 'viì mì wó.

⁸ Tacó éno, go yo táánò tí ze ngé ndii gî. Ña go yo tí nò táánò tí ze nò! Go yo giì te ze cuki me ká gítí bà ma Banga-Ngú-Có ji yo lá. À giì te mítí ze delè a go bà 'vala ta ɾè mì yo. Yo táánò a ndâ wú-gbì-ɾé ze.

⁹ Go bà 'va mbí yo gítí ndâ ña serè nèté tí nó náa ze táánò kù bàkà nó kuu tí ze, ndâ ná'vindí ze. Síí gbí o bà bàkà nèté tacó bà 'de ndâ i mì ze gítí miɾi ze ta o tí nò náa ze táánò kù ma ta Banga-Ngú-Có ji yo nò wálá. Ze táánò ñò ɾi ni lá. Ze delè ñò bèbìlì ni lá. Ze táánò kù bàkà ndâ ña serè nèté tí nò éno, tacó wàa, ze 'ví pèè ta mbí 'bí 'duù gbaànjé tacó 'bí i ta o tí nò náa ze táánò kù ma ta Banga-Ngú-Có ji yo nò lá.

¹⁰ Yo ñò ta ɾo yo gî, Mbírì delè ñò gî, máa, ze táánò kù 'vala ta yo gbí tó ña kpokèjì. Ze 'vala ta yo ta banga tí, ta tiɾi mì ze gítí yo wálá.

¹¹ Yo ñò ni gî, máa, ze táánò kù kpo-gbì-tà-tù yo ká go bà kpo-gbì-tà-tù ndâ 'viì mì bu ndú. Ze kù je wotí ji yo ká go bà je wotí mì bu ndâ 'viì á ji ndâ 'viì mì wó. Ze delè kù do mítí yo náa yo má bàkà i mbe lè gî ká go ñìnó náa bu ndâ 'viì kù bàkà ta ndú.

¹² Ze táánò a ndâ mbe kù nìbà kpokèjì ñìnó jáá nó ji yo. Ze a ndâ mbe kù je wotí ji yo. Ze delè a ndâ mbe kù 'deke tí ze ji yo, máa, yo 'ví co tí kpokèjì ñìnó mbe kù nìkì tí Mbírì, tí mbe kù tè'é tí yo gí gbí ngba wó, delè tí mbe kù tè'é tí yo máa, yo 'ví dù tí ndâ bòò-gba mì yì nô.

¹³ Ze ta o 'dáá gî kù 'dè nìkì maa ji Mbírì tacó tí yo, tacó ta o tí nó náa ze táánò ya tí ta có mì wó tí Mbírì gí mì yo kà nó, yo gii ùnje gítí gî. Yo ùnje gítí nò me go bà ùnje mì 'duù gítí có mbe co 'do gbí nje 'bí ka wó 'duù á muu to tí nó nò lá. Yo ùnje gítí a i go bà ùnje mì ndâ 'duù gítí có mbe co 'do gbí nje Mbírì. À dú káa yúcó, có tí nó náa ze táánò ma ji yo nó a có mbe co 'do gbí nje Mbírì, à me có náa 'bí 'duù ká koṛo 'do gbí muu wó nó lá. A có tí nó mì Mbírì mbe dù kù bàkà nèté gbí njembí ndâ mbe ùnje gítí gî nò.

¹⁴ Tacó yo tí ndâ ná'vindí ze kpónó kù co ká ndírí tí gbèe kpokèjì tí nó náa ndâ 'duù mì Mbírì mbe kù kili ta rẹ̀ mì Bìndi-Mbírì gbí ndâ to Jùdèyà kù co tí nò. Tacó yo kù mbu ji bà mèèkè'i tí yo mì ndâ 'dóó nambe yo jé ká go ṅa bà mbu ndú 'bì ndâ nambe ndú tí ndâ Jùdèyà,

¹⁵ tí ndâ mbe zi Mbe tí ndoo tí Jézù. A ndâ ṅa ndâ 'duù tí nó táánò ká ziki ndâ 'bí mbe 'dòkò có mì Mbírì. Áá táánò a ndú tí ndâ Jùdèyà ká kù mèèkè'i tí ze. I tí ndú a bà bàkà ndâ i ṅinó mbe kù kpolo tàkòcò Mbírì, gii je bà jòò gbí có ta ndâ 'duù 'dáá gî.

¹⁶ A ndú táánò ká kù bàkà bà jòò gbí có, ta bà nè kpokèjì bà ma có mì Mbírì ji ndâ 'duù ṅinó ta ṅa ndú me ndâ Jùdèyà lá nó 'do tí ze, tacó wàa ndâ 'duù ṅinó náa ndú me ndâ Jùdèyà lá nó 'ví 'de ta 'válá lá. Ndú kù bàkà vò i ká mí pí ka wó vò i. Káa ndú bà 'de mbèlè kpo-tàkòcò mì Mbírì mítí ndú.

Go bà co wìrì gí Tèsàlónìkà káká'i kuu tí Páwòlò

17 Káa à má gítí ze, ndâ ná'vindí ze, 'do tí o tí nó táánò náa ndoo njèè ta gbí òkò tí ndoo ta làmbu o nó, à káa kùfolofo dùi ze ká kàá, káa njembí ze 'dáá gî a i mì yo kà. Ze bàkà ña i muu to tí nó cee gî, tacó wàa ndoo 'ví ñò ta tí ndoo káká'i,

18 tacó kô'o tí yo bàkà có bà zi ze gî. 'Dóó ye tí Páwòlò nó bàkà dú káa ndi ye tacó bà ñò yo, káa Vò-'duù-tí-nò nè kpokèjì 'do tí ye gî.

19 Yo kù koṛo có máa a ndâ 'di ká bà te líkí'o mítí ze kùṛo Mbe tí ndoo tí Jézù ta o bà gí yí wúnò? À me yo lá? A yo wúnò ká bà dù tí ndâ ngbù èrè náa ze bà seke mí gbí muu ze, kù dùlù ta tí ze ta ña wálá kùṛo Mbe tí ndoo tí Jézù.

20 Tacó a yo ká kù mba ze. À delè káa yo ká kù peteke tàkòcò ze.

3

1 Bà zèè njembí ze gítí bà njèè gbí òkò tí ndoo dúú kù ya tí mâ gii co tí ze gî, ndongbú có mì ze gii dù ènò máa, à ñìkì tí ze á bà tuu Tìmàtéyò ya tí ji yo kà, wàa ze ta Sìlìvànò 'ví dù ñìndi ze gbí gbata Àtínà.

2 Tacó ènò, ze gii tuu Tìmàtéyò tí ná'vindí ze, tí ka ze náa ze kù bàkà nèté mì Mbíṛì tí nèté bà ma Banga-Ngú-Có mì Bìndi-Mbíṛì ta ndú nó, máa, yí 'ví ya gí bà konì yo ta bà sè ta nèté gítí bà tee njembí yo mítí Mbíṛì mí tà to tí kpoò.

3 Ze bàkà ènò tacó wàa, njembí yo 'dáá gî 'ví me ta duù gbí ña vò o tí nó náa yo kpónó gbí nô. Yo delè ta kpéetí yo ñò ni gî, máa, ñìnò a ña ñìndi ndoo gbí tú ndoo.

⁴ Tacó ze táánò kù ci yo ta o tí nó náa ze kuu tí mì yo kà nó éno máa, «O bà mèèkè'i tí yo mì ndâ 'duù ká kèjì! O bà mèèkè'i tí yo mì ndâ 'duù ká kèjì!» Káa à kpónó nò a yí náa yo kù ñò mítí yo nò.

⁵ Ye táánò tuu Tìmàtéyò nò éno máa, yí ya gí bà ñò máa, yo ká kpòò kù tee njembí yo mítí Mbírì wè? Tacó ré ze kàra ta gúku gí, máa ndâ-'bì-lá, wotí mì Vò-'duù-tí-nò mbe kù eendi ndâ 'duù gítí vò i nó bà ndii muu wotí mì yo, tí ña ñinó náa ndâ nèté tí nó náa ze táánò bàkà gbí òkò tí yo kà nó bà ya sínò.

⁶ Káa Tìmàtéyò giì dele ndi wó 'do mì yo kà ji ze ta ngú có mbe peteke tàkòcò ze éno máa, yo kù tee njembí yo mítí Mbírì, yo kù 'vala ta ndâ 'duù ta tó njembí yo, tàkòcò yo ta o 'dáá gí ká pètékè'i gítí ze, yí delè giì 'dè có ji ze máa, kô'o tí ze bà ziki yo ká gí, go ñinó náa kô'o tí yo kù kàraka ta ré ze káá gí nò.

⁷ A có bà tee njembí yo mítí Mbírì nò ká kù 'dèè njembí ze gbí ndâ ña bà mèèkè'i tí nó náa à kù mèèkè mítí ze káá nò, ndâ ná'vindí ze.

⁸ Njembí ze kpónó ki tí to gí, tacó ze 'di gí máa, 'bì yo ká kácáá kuu tí Mbe tí ndoo.

⁹ Ze kpónó 'ví 'dè ñikì maa ji Mbírì gbí ña nje có yè gítí ña bà peteke tàkòcò ze tí nó náa ze kpónó tí kuu kùro wó tí Mbírì tacó tí yo nó!

¹⁰ Ze kù 'deke tí ze ji Mbírì ta síí gbí wálá, tacó wàa, yí 'ví si ndoo 'ví 'de tí ndoo káká'i. Tacó wàa, ze 'ví je ndâ 'bí i ñinó mbe gboo 'do tí bà tee njembí yo mítí wó tí Mbírì gí nó ji yo.

¹¹ Ze kù 'deke tí ze ji yí tí Mbírì tí Bu ndoo, ze delè kù 'deke tí ze ji Mbe tí ndoo Jézù tí Bìndi-

Mbíri, máa, ndú 'ví 'viindi kpokèjì bà ya gí mì yo kà jì ze.

¹² Ze kù 'deke tí ze éno máa, Mbe tí ndoo 'ví je bà 'vala ta tó njembí mí gbí òkò tí yo jì yo, yí delè 'ví si yo 'ví 'vala ta ndâ 'bí tende 'duù ta tó njembí yo á go cè bà 'vala ndoo ta ndoo.

¹³ Tacó wàa yí 'ví bàkà yo tí ndâ 'duù ònó ta bà lê tí yo wálá, náa yí tí Mbíri kaa yo mò gí mì wó gí á kùro wó tí Mbíri mì ndoo tí Bu ndoo, ta o bà gí ndâ Mbe tí ndoo Jézù ta ndâ tó 'duù mì wó wúnò.

4

Na bà 'vala ndò ònó mbe kù peteke tàkòcò Mbíri nò

¹ À má éno, ze kpónó kù wa jì yo a gbí ta rẹ̀ mì Mbe tí ndoo Jézù éno máa, yo káká'i 'ví ne 'do tí òa kpokèjì 'válá ònó mbe kù peteke tàkòcò Mbíri, náa yo táánò ò 'do mì ze nó lá, ndâ ná'vindí ze. Yo co ká tí gbèe kpokèjì tí nò, á go ònò náa yo kpónó kuu nje nò dúú kù ya tí .

² Tacó yo ò ndâ i tí nó náa ze táánò nìbà ndú jì yo á 'do gbí wotí mì Mbe tí ndoo Jézù nó ni gí.

³ Có gbí njembí Mbíri gítí yo éno máa, yo 'ví dù tí ndâ tó 'duù, wàa yo 'dáá gí 'ví dù janga-jàngá gí ndiá á 'do tí ndâ vò i. Yo delè 'dáá gí 'ví dù tí ndâ ngbàrángà 'duù mbe kù kù'ba 'do tí bà bàkà bangbaya.

⁴ Wàa yo 'dáá gí 'ví kò ni gbí tó kpokèjì náa ndâ 'duù kù te duù mítí ,

⁵ yo dù ta go bà dù ta ndâ ni sàkàmàà go i mì ndâ 'duù ònó mbe ò dúú kpokèjì bà peteke tàkòcò Mbíri ni lá nó lá.

⁶ Cò gbí njembí Mbírì gítí yo delè éno máa, 'bí 'duù 'ví gírì'o ta 'viya gítí ná'vindí wó ta bà tèrì cìkii nawù wó nò lá. Ze táánò 'dè có tí nò ji yo sàà kùro gî. Ze delè giì ci yo éno máa, Mbírì bà waa có mítí ndâ mbe bàkà ña i-'viya tí nò ta wotí ká tí nò gî.

⁷ Mbírì táánò tè'é tí ndoo me gítí gílìnì lá; yí tè'é tí ndoo tacó wàa ndoo 'ví dù tí ndâ 'dóó ñinó mì wó tí Mbírì. Yí tè'é tí ndoo tacó wàa ndoo 'ví dù janga-jàngá gí ndiì 'do tí ndâ vò i.

⁸ À má éno, 'duù má nè tù wó 'do tí bà 'di có tí nó náa ze kù 'dè nó gî, yí kù nè tù wó nò me 'do tí bà 'di có mì ze tí ndâ 'duù go yí lá, yí kù nè a i 'do tí bà 'di có mì Mbírì tí mbe je Bèrì mì wó tí Mbírì ji yí tí 'duù tí nò.

⁹ À má gítí có bà zè ndâ ná'vindí yo ñikì maa, nderè bà cu wáràgà mì 'bí 'duù 'do gbí òkò tí ze á ji yo gítí ñinò wálá, tacó Mbírì táánò ñibà ñinò ji yo gî.

¹⁰ À delè dú káa yúco máa, yo kpónó kù zè ndâ ná'vindí yo gbí ndâ to Mèsidóniyà 'dáá gî ñikì maa. Káa ze kpónó kù 'deke a tí ze ji yo tí ndâ ná'vindí ze éno máa, yo 'ví zè tí yo gbí òkò tí yo dúú kù ya tí gí kùro ñikì ndiì ñinó náa yo kù bàkà kpónó nó gî.

¹¹ Yo bàkà wotí gítí éno máa, gbínje 'ví dù gbí òkò tí yo lá. Bìndi , yo 'ví koṛo có me gbolò a i gítí bà bàkà nèté tacó bà 'de i-zó-zò mì yo, á go có tí nó náa ze táánò 'dè ji yo nò.

¹² Yo ko tí yo ta 'bì yo, tacó wàa, ndâ 'bí tende 'duù 'ví ùlù ta rẹ yo éno máa, yo me ndâ mbe kù zò i gbí wu'o mì ndâ 'bí 'duù nò lá.

O bà gì Mbe tí ndoo wúnò

¹³ Go bà 'dè có jì yo gítí ndâ ku kuu tí ze, ndâ ná'vindí ze. Yo si bà dù ta sé có gbí njembí yo ngé ndii gí tacó tí ndâ 'bí ka yo ñìnó mbe cì gí nó mí to. Tacó ñìnò a ña i mì ndâ 'duù ñìnó mbe koṛo có gítí bà 'vala ndi ndâ ku 'do gbí muu'dú ndú lá nó ká nò.

¹⁴ Ndoò lê má ùnje gí, máa, Jézù táánò cì gí, bìndi yí gí 'vala ndi wó 'do gbí muu'dú wó gí, gbí éno máa, Mbíṛì bà 'vala ndi ndâ 'bí ka ndoo ñìnó mbe cì gí nó 'do gbí muu'dú ndú ta rẹ̀ mì Jézù, ká go bà 'vala ndi wó tí Jézù nò, bìndi a yí tí Jézù ká bà gí gí bà tè kùṛo ndú ya tí gí gbíṛì.

¹⁵ Có tí nó náa ze kpónó kẹ̀jì gí bà 'dè jì yo nó a có mbe co 'do gbí nje Mbíṛì. Kòcò Mbíṛì éno máa, ta o bà gì Mbe tí ndoo káká'í wúnò, ndoo tí ndâ 'duù ñìnó tí ndâ wu 'duù ta ɾì tí nó nó bà yee mì wó kùṛo si ndâ 'duù ñìnó mbe cì sàà gí nó mí ndii wálá.

¹⁶ Tacó ta o tí nò, à káa 'dóó Mbe tí ndoo ká bà gí 'do gbíṛì gí muu to tí nò. Yí bà gí gí bà 'dè có ta kòcò wó ngéé gí yaà. Bìndi , kùṛo ndâ basìlì mì Mbíṛì bà gí tè'é tí ndâ 'duù. Gbí mòngò mì Mbíṛì bà gí me tí, bìndi ndâ 'duù ñìnó tí ndâ 'duù mì Bìndi-Mbíṛì mbe cì sàà gí nó ká bà 'vala ndi ndú 'do gbí muu'dú ndú á kùṛo má kózò gí nó,

¹⁷ áá bà gí tè'é tí ndoo tí ndâ 'duù ñìnó mbe cì lá nó á gí mì ndú gbí kùlù mù tàrì, tacó wàa, ndoo 'ví kaa toko gbaànjé ta ndú ya gí kùṛo Mbe tí ndoo gbí píṛì, gí bà dù ngbé ká á mì ndoo ta ndú kà.

¹⁸ À má éno, yo yì tí yo gbí òkò tí yo ta o ku ta

ndâ có tí nò.

5

Yo 'viindi tí yo á gítí o bà gí Mbe tí ndoo

¹ Káa à má gítí sè ndâ sili, ta ndâ pì, ta ndâ o bà bàkà tí mì ndâ i tí nò, ze bà cu mbè có gítí ndú jì yo wálá, ndâ ná'vindí ze,

² tacó yo ta kpéétí yo ò ni gí, máa, o bà gí Mbe tí ndoo káká'i wúnò bà dù go bà gí mbe ngbà ta bèbìlì.

³ Ndâ 'duù ta o tí nò bà dù kù koṛo có máa, «Vò i wálá.» Káa ndú gù gu maa káa ndiì ta bà gbo ndú mì vò i, go bà gbaaka niì mì gó-káyì, bìndi 'bí i náa ndú bà bàkà nó wálá.

⁴ Káa yo kpónó kù 'vala me gbí 'dí'di'o tacó wàa o tí nò 'ví gbaaka tí ta yo á go bà gbaaka yo mì mbe ngbà nò lá, ndâ ná'vindí ze.

⁵ Tacó yo 'dáá gí a ndâ 'vii gbí ngba'o, tí ndâ 'vii gbí ngbàà ři. Ndoos ta ndoo 'dáá gí me ndâ 'duù gbí 'dí'di'o lá.

⁶ À má éno, ndoo tèrì á go i mì ndâ 'bí 'duù lá. Ndoos dù tí zò'o ta ṛo ndoo ngbárángà'i.

⁷ Tacó ndâ mbe tèrì kù tèrì a i ta bèbìlì. Ndâ mbe kù sa ta pe delè kù sa a i ta bèbìlì.

⁸ Káa ndoo a ndâ 'duù gbí ngba ři, à má éno, ndoo dù ta ṛo ndoo ngbárángà'i. Ndoos si bà tee njembí ndoo mítí Mbířì, gù je bà zè Mbířì nìkì maa, 'ví dù go kùngù tacó bà lì ta zí'i 'do tí ndoo gbí gó. Wàa, bà koṛo có lì mítí Mbířì 'ví dù tí i bà lì mù 'do tí muu ndoo gbí gó.

⁹ Mbířì táánò cu 'bì wó mítí ndoo me tacó bà mbu ndoo gí tàkò có mì kpo-tàkòcò mì wó lá. Yí

bàkà a i tacó bà 'vala ndoo ta ɾè mì Mbe tí ndoo Jézù tí Bìndi-Mbírì,

¹⁰ tí mbe cì tacó tí ndoo. Tacó wàa, ndoo 'ví dù toko ta ndú si ndoo kpónó kù 'vala muu to tí nó nò; delè tacó ndoo 'ví dù toko ta ndú bìndi bà cì ndoo.

¹¹ À má ènò, yo je wotí ji ndâ 'bí ka yo. Yo konì tí yo gbí òkò tí yo á go ñinó náa yo kù bàkà kpónó nò.

Ndòngbú có

¹² Ze kù 'deke a tí ze ji yo éno máa, yo 'ví te duù míti ndâ 'duù ñinó tí ndâ kpo 'duù kùro yo, mbe kù bàkà nèté bà ñibà tó kpokèjì ji yo ta ɾè mì Mbe tí ndoo nò, ndâ ná'vindí ze.

¹³ Yo te duù míti ndú ndii bà te duù mì yo míti sè ndâ 'duù 'dáá gî. Yo 'dè ñikì maa ji ndú tacó nèté tí nó náa ndú kù bàkà nò. Yo delè 'ví 'vala gbí òkò tí yo ñikì maa.

¹⁴ Ze kù yù 'do mì yo a nambeè éno máa, yo 'ví 'dè có gítí bà bàkà nèté ji ndâ mbe kpó tí kpoò, ndâ ná'vindí ze. Yo je wotí ji ndâ 'duù ñinó á gbí òkò tí yo ta wotí bà te ɾo ndú gí yaà kùro ndâ 'duù á tí ndú wálá nò. Yo konì ndâ 'duù ñinó ta wotí tí ndú wálá nò. Yo delè 'ví kònò ndâ 'duù 'dáá gî.

¹⁵ Yo kèèndè vò i gbí òkò tí yo lá. À 'ví dù gbí njembí yo ta o 'dáá gî káa có gítí bà bàkà tó i gbí òkò tí yo, ta có gítí bà bàkà tó i ji ndâ 'bí tende 'duù.

¹⁶ Yo 'ví dù ta pétékè tàkòcò yo ta o 'dáá gî.

¹⁷ Yo 'ví kaɾa tà bà 'deke tí yo ji Mbírì lá.

¹⁸ Yo má gbí dà, yo 'ví 'dè ñikì maa ji Mbírì, à delè má volo míti yo gî, yo má gbí mbúlùwu, yo

'ví 'dè nìkì maa jì yí, tacó ònò a òa có ònó náa à gbí njembí wó gítí yo tí ndâ mbe kù 'vala ta òè mî Bìndi-Mbírì tí Jézù nó ká nò.

¹⁹ Yo 'ví 'buuku muu wotí mî Bèrì-mì-Mbírì lá.

²⁰ Yo delè 'ví go 'vèrè mítí có ònó náa a Mbírì ká wu mí gbí nje 'duù nó lá.

²¹ Yo 'viiki gbí có kùro má kózò gi. Yo má 'de có tí nò tí yúcó, yo 'ví nanaka muu yo mítí ,

²² káa yo má 'de tí 've có, yo 'ví mò tí yo 'do tí ndâ 've i 'dáá gî gî.

²³ Ze kù 'deke tí ze jì Mbírì tí mbe kù je tó bà dù ndò jì ndâ 'duù, máa, yí 'ví kaa yo mò gí mî wó. Yí 'ví si yo 'ví dù ta gbí dî yo nìkì maa, ta bà lê tí yo wálá, ta vò i tí lílì yo wálá, ta njembí yo ngbàrángà'i kù ù ta ndi bà gî Mbe tí ndoo Jézù tí Bìndi-Mbírì.

²⁴ Mbírì tí mbe tè'é tí yo bà si yo 'ví dù tí ndâ mbe bàkà sóló i wálá, tacó yí me mbe ne 'do tí po ngo nje wó lá.

²⁵ Yo 'deke tí yo jì Mbírì tacó tí ze, ndâ ná'vindí ze.

²⁶ Yo 'vee ndâ ná'vindí ze kà ta njembí bà zè Mbírì tacó tí ze.

²⁷ Ye kù be jì yo a tí Mbe tí ndoo éno máa, yo 'ví 'deke wáràgà tí nó jì ndâ ná'vindí ndoo á mî yo kà 'dáá gî.

²⁸ Nambeè mî Mbe tí ndoo Jézù tí Bìndi-Mbírì 'ví dù ta yo.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa